

par la cena di PATRIZI
CHIASSO, il 22 gennaio 1994

Che la parola PATRIZI
la faga rima cun vizi
l'è ciar
ma l'è rar
truvà la fantasia
par fa gio 'na puesia.

Cumè sa fa a regurdass
da tüü quel che sücced a Ciass;
mi pö che sun luntan
in mezz al burdeleri da Lügän
l'è difficil a tirà insema
par una ciciarada - ul tema !

La cà GIARDINO mò l' è a tecc
par i san e i malaa vecc.
L'è un palazz in piotta
e l'a custaa una motta.
Mò al su duvè andà
prima da crepà.

Sun curius se l' AUTOSTRADA
la vegnarà inbuttigliada
cumè l'ha previst un BOTTA architett;
già ul so nom al fa effett.
D'altra part ul fracass
l'è prerugativa del nost Ciass.

Da dannee a Ciass ga n'è tanti
e - da imbrliun - altrettanti;
ma i miliun i van e i vegn
i chi ga iha , i a tegn.
Par furtüna gh'è ammò i PATRIZI
g'avran anca lur i so vizi,
ma la gent l'è ammò a post
la sa cuntenta da salsa e rost.

Siccome la nostra ASSUCIAZIUN
- la g'ha anca quel da bun-
l'è apolitica, e quest al ma pias
metti mia deht ul nas
par natüra e par principi
in quel che sücced in MUNICIPI... .

... e dumà in un quai cas special
in quel che büi in Cunsili Cumunal
l'impurtant l'è che tütt funziona
in urdin e minga a la carlona.

Perchè pö Ciass la met giò düra
par i sac da la spazzatüra
quand a Züurig l'è già dü ann
che a ga pissa doss i can.
L'impurtant l'è trovà i ghei
par fa i robb bun e mei.

I fastidi dal sindic Pedralini
i, minga dumà i sac e i quattrini
perchè in fund a sa na frega
di begh e da la Lega.
In dal so discurs dal prim da l'ann
l'è andaa a cercà i robb luntan
l'ha scrivüü una pagina da storia
par ul nost paes e la sua gloria.

A sem che l'onorevole Pantani
al fa part da la curt di NANI,
però che ga na daga un tai
la gh'è piü la curt di Stai !

Ul President dal nost FOOT-BALL
al vör 'na fö di ball,
pecca^d, perchè 'l sciur Bernascun
l'è vün di poch bun
a tegi in pè la baracca
cun pazienza e ceralacca.
Ma ul calcio, al di d'in cö
l'più cumè quand nüm serum fiö
l'è un mestee che costa car
e ul guadagn l'è multu rar....

Peccaa che un impurtant Ciasses
amis da la storia dal nost paes
Adolfo Bächtold giornalista e scrittur
a l'è partii cun tantu unur.
Chi sarà bun da dass la pena
da scriv ben cun la sua pena ?

Cari Patrizi, al credarii mia
quel che cüntra l'è minga la puesia
ma ul nost bel dialett.
Quel si ch'et fa effett.
Al fa regurdà i temp d'una volta
i cà da sag^se da molta
i curt e i strad cun la riscuada!
Pardunim la cicciarada.

Carlo Chiesa .